

**ILUARSIISSUT**

Siunnersuut 1. marts 2024-meersoq taarserpaa (§ 1, imm. 2, 3. oqaas., § 6, imm. 3, 2. oqaas. aamma imm. 4, 2. oqaas. peerneqarput. § 23, nr. 1, § 25, imm. 5 kiisalu § 33, imm. 1-mik allannguisoqarpoq. § 4, imm. 1, 3. oqaas., § 4, imm. 6, § 6, imm. 6, § 7, imm. 3 aamma 4, kiisalu § 30, imm. 2-mik ilanngussisoqarpoq. Tamatuma saniatigut siunnersuummi oqaaseqatigiinnik ataasiakkaanik iluarsiiisuteqartoqarpoq)

**Uunga siunnersuut:****Peqqinnissaqarfiup iluani napparsimasut naammagittaalliuteqarsinnaanerat taarsiiffiqarsinnaanerallu pillugit Inatsisartut inatsisaat****Kapitali 1***Aalajangersakkat nalinginnaasut**Atuuffia*

§ 1. Inatsisartut inatsisaat peqqinnissaqarfimmi peqqissaanermik suliaqarneq pillugu naammagittaalliuteqarnermut, peqqinnissaqarfimmi peqqinnissamut tunngasutigut sulinermut, peqqinnissaqarfimmi suliarinninnivik pillugu naammagittaalliuteqarnermut (sullineqarnermut maalaarutit) kiisalu napparsimasut ajoqusernerinut taarsiinissaq pillugit sulianut atorneqarpoq.

*Imm. 2.* Pinnersaallutik passussisartut kakiuisartullu Inatsisartut inatsisaannut matumunnga ilaangillat, taamaattorli immikkoortoq 2. Kakiuisartut, nakorsaanikkut kakiuisut Inatsisartut Inatsisaannut ilaapput.

*Imm. 3.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut Inatsisaat malillugu naammagittaalliutit Inatsisartut inatsisaannut matumunnga ilaangillat.

*Imm. 4.* Nakorsaatinit ajoquserneqarnermut taarsiinissaq pillugu suliat Inatsisartut inatsisaannut matumunnga ilaangillat.

*Imm. 5.* Peqqinnissamut tunngasutigut katsorsaasutut akuerisaasunit katsorsaasartut allat inatsimmut matumunnga ilaasinnaanerat pillugu Naalakkersuisut malittarisassanik aalajangersaasinnaapput.

*Nassuiaatit*

§ 2. Uani Inatsisartut inatsisaanni uku ima paasineqassapput:

- 1) "Peqqinnissaqarfik": peqqinnissaqarfiit tamarmik, taakkununnga ilanngullugit napparsimmaviit, peqqissaaviit, nunaqarfinni napparsimmaveeqqat, nunaqarfinni nakorsiartarfiit il.il.
- 2) "Peqqinnissakkut iliniarsimasutut sulineq": Napparsimasut inatsisitigut inissisimanerat pillugu Inatsisartut peqqussutaani nassuiarneqartutut katsorsaaneq.
- 3) "Peqqinnissaqarfimmi sulisoq":

- a) Danskit akuersissuteqarnerat tunngavigalugu peqqinnissakkut ilinniarsimasutut sulisut, taakkununga ilanngullugit nakorsat, kigutit nakorsaat, kiropaktorit, ernisussiorlut, pillorissaasut, aaviisartut, napparsimasunik sullissinnermi nerisassalerisut, tarrarsuisartut, poortuusiortut, kigutilerisut, kigutigissaasut, isaruaarniat, kontaktlinseerniat, isarualerisut, isikkanik tagiartuisartut, isumaginninnermi peqqinnissamullu ikiortit allallu.
- b) Peqqinnissaqarfiup iluani sulinnermut tunngatillugu tarnip pissusaanik ilisimasallit, paarsisartut, peqqissaanermi ikiortit, utoqqaat illuini assistentit, nakorsaaserisut, nakorsaaserisut nakorsaaseriffinni sulisut, farmakonomit farmaceutitullu ilinniartut nakorsaaseriffimmi ilinniarnermik ingerlatsisimasut.
- c) Kigutit nakorsaasa namminersortut peqqinnissakkut ilinniarsimasutut sulisut.
- d) Kalaallit Nunaanni ilinniarsimaneq akuersissuteqarnerluunniit tunngavigalugu inuit peqqinnissakkut ilinniarsimasutut sulisut, tassunga ilanngullugit nakorsat, peqqissaasut, kigutigissaasut, kigutit nakorsaanut ikiortit, peqqinnissamut ikiortit, peqqinnissamut assistentit, peqqinnissakkut sulisut, peqqinnissakkut ikiortit portøritullu annaassiniartartut.

## **Kapitali 2**

### *Naammagittaalliornissamut periarfissat*

#### *Peqqissaanermik suliaqarluni ingerlatsineq pillugu naammagittaalliorsinnaaneq*

§ 3. Peqqinnissaqarfiup peqqissaanermik suliaqarluni ingerlatsinera pillugu napparsimasut naammagittaalliutaat kiisalu Napparsimasut inatsisitigut inassisimanagerat pillugu Inatsisartut peqqussutaanni kapitali 2-5-imi allassimasut pissutsit pillugit naammagittaalliutit Danmarkimi Napparsimasut naammagittaalliutaannut Aqutsisoqarfiup isumagisarai. Peqqinnissaqarfiup peqqissaanermik suliaqarluni ingerlatsinera tamakkiisumik ilaannakortumilluunniit § 4 naapertorlugu peqqissaasutut sulisut pillugit naammagittaalliutinut tunngasoq pineqarpat, taava Napparsimasut naammagittaalliutaannut Aqutsisoqarfiup imm. 1 naapertorlugu naammagittaalliutit suliarisinnaanngilai.

*Imm. 2.* Napparsimasut naammagittaalliutaannut Aqutsisoqarfik peqqissaanermik suliaqarluni ingerlatsineq peqqissaanermik suliaqarnermi nalinginnaasutut isigineqartunit appasinnerunersoq imaluunniit katsorsaavik napparsimasup inatsisitigut pisinnaatitaaffii pillugit malittarisassanut akerliusumik iliuuseqarsimanersoq pillugu aalajangiissaaq.

*Imm. 3.* Imm. 2 naapertorlugu aalajangiinerit allaffissornikkut oqartussanut allanut ingerlateqqinneqarsinnaanngillat.

§ 4. Kalaallit Nunaanni peqqinnissakkut sullissisunit peqqinnissakkut ilinniarsimasutut sullissineq pillugu napparsimasut naammagittaalliutaat Danmarkimi Napparsimasut Maalaarutaannik Aalajangiisartunut saqqummiunneqassapput. Naammagittaalliutit Napparsimasut Maalaarutaannik Aalajangiisartunut suliassanngortinnissaat pillugit Nunatsinni Nakorsaaneqarfik aalajangiisuusarpoq, tak. imm. 2. Nunatsinni Nakorsaaneqarfik aamma nammineerluni suliassanngortitsisinnaavoq.

*Imm. 2.* Sakkortuumik pisimasoqartoq Nunatsinni Nakorsaaneq isumaqarpat Kalaallit Nunaanni peqqinnissakkut sullissisunit peqqinnissakkut ilinniarsimasutut sulineq pillugu sulianik Napparsimasut Maalaarutaannik Aalajangiisartunut Nunatsinni Nakorsaaneqarfik suliassanngortitsissaaq.

*Imm. 3.* Naammagittaalliut peqqinnissakkut ilinniarsimasutut sulinermit tunngassuteqartoq § 3 malillugu naammagittaalliummut ilaappat, taava Napparsimasut Maalaarutaannik Aalajangiisartut naammagittaalliut suliarisinnaanngilaat.

*Imm. 4.* Peqqinnissakkut ilinniarsimasutut sulisoq peqqinnissakkut ilinniarsimasutut sulinera ilinniarsimasut pitsaassusilittut nalinginnaasutut isigineqartunit appasinnerunersoq imaluunniit napparsimasup inatsisitigut pisinnaatitaaffii pillugit malittarisassanut akerliusumik peqqinnissakkut sulisoq iliuuseqarsimanersoq pillugu Napparsimasut Maalaarutaannut Aalajangiisartut aalajangiissapput.

*Imm. 5.* Imm. 1-4 naapertorlugu aalajangiinerit allaffissornikkut oqartussanut allanut suliassanngortinneqarsinnaanngillat.

*Imm. 6.* Imm. 1 aamma 2 pillugit malittarisassanik erseqqinnerusunik Naalackersuisut aalajangersaasinnaapput, peqqinnissakkut ilinniarsimasutut katsorsaaveqanngitsuni suliat pillugu aalajangiinerit saaffiginnissutigineqarsinnaanerit ilaapput.

**§ 5.** Peqqinnissaqarfiup peqqinnissakkut ilinniarsimatut sulineq, peqqinnissakkut sulisut ilinniarsimasutut sulinerat pillugu naammagittaalliutit aamma Napparsimasut inatsisitigut inissisimanerat pillugu Inatsisartut peqqussutaanni kapitali 2-5-imi allassimasut pissutsit pillugit naammagittaalliutit Nunatsinni Nakorsaaneqarfimmuut tunniunneqassapput.

*Peqqinnissamut tunngasutigut sulineq pillugu naammagittaalliutinik suliarinninneq*

**§ 6.** Nunatsinni Nakorsaaneqarfik § 5 naapertorlugu naammagittaalliummik tigusaqarpat, naammagittaalliut Inatsisartut Inatsisaat manna naapertorlugu suliarineqarsinnaanersoq pillugu Nunatsinni Nakorsaaneqarfiup nalilissavaa.

*Imm. 2.* Nunatsinni Nakorsaaneqarfik misissoriikkanik allattuiffimmi atortunik aamma katsorsaavimmit naammagittaalliutigineqartumit oqaaseqaammik pissarsiniassaaq, aamma suliap aalajangersimasup naliliiffigineranut pingaaruteqartutut isigineqarsinnaasut Kalaallit Nunaanni pissutsinik atukkanillu allaaserinnittumik suliamik saqqummiussissaaq. Suliamik saqqummiussineq atugassallu Napparsimasut Naammagittaalliutaannut Aqutsisoqarfimmuut imaluunniit Peqqinnissaqarfimmi Aalajangiisartunut nassiunneqassapput aamma naammagittaalliummik Aqutsisoqarfiup suliarinninneranut tunngavissatut ilaatinneqassallutik.

*Imm. 3.* Nunatsinni Nakorsaaneqarfiup aalajangiinissamut piareersarneranut atatillugu pisoqalisoorsimaneq pillugu aalajangiisinnaavoq.

*Imm. 4.* Naammagittaalliut erseqqissumik tunngavissaqanngippat taamaasillunilu Inatsisartut Inatsisaannut ilaatinneqanngippat, taava Nunatsinni Nakorsaaneqarfiup naammagittaalliutit suliarinissaa itigartitsissutigisinnaavaa.

*Imm. 5.* Nunatsinni Nakorsaaneqarfiup, tamanna attuumassuteqarpat pisariaqarpallu, suliame atugassat danskisuumut kalaallisuumulluunniit nutserneqarnissaat qulakkiissavaa.

*Imm. 6.* Paragrafimi uunga tunngasut pillugit malittarisassanik erseqqinnerusunik Naalakkersuisut aalajangersaasinnaapput, tassani naammagittaalliorsinnaaneq ilaavoq.

**§ 7.** Nunatsinni Nakorsaaneqarfik piffissaq eqqorlugu peqqinnissakkut ilinniarsimasutut sulisut pillugit naammagittaalliummik tigusaqarpat, § 8 naapertorlugu, napparsimasup katsorsaaviummik oqaloqateqarnissaa Nunatta Nakorsaaneqarfiata neqeroorfigissavaa. Napparsimasoq neqeroorummut akuersippat maalaarut katsorsaavimmut nassiunneqassaaq, taannalu napparsimasumut attaveqarluni naammagittaalliummillu katsorsaaviup tigusaqarnerminit kingusinnerpaamik sapaatit akunneri sisamat qaangiutsinnagit oqaloqatigiinnissaq neqeroorutigissavaa.

*Imm. 2.* Oqaloqatigiinnerup kingorna napparsimasup naammagittaalliuutini taamaatiksuppagu napparsimasullu akuersineratigut tamanna Nunatsinni Nakorsaaneqarfimmut katsorsaaviup nalunaarutigissavaa, tamatumalu kingorna naammagittaalliut naammassineqartutut isigineqassalluni. Oqaloqatigiinnerup kingorna napparsimasup maalaarutimi sulii suliarineqarnissaa kissaatigippagu suliami paasissutissat attuumassuteqartut tamaasa suliarineqarqinnissaanut atugassanngorlugit katsorsaaviup Nunatta Nakorsaaneqarfianut nassiutissavai.

*Imm. 3.* Imm. 1 naapertorlugu oqaloqatigiinnermi napparsimasoq illersorteqarsinnaatitaavoq

*Imm. 4.* Imm. 1-mut tunngasut pillugit malittarisassanik erseqqinnerusunik Naalakkersuisut aalajangersaasinnaapput, tassunga ilaapput katsorsaaviit sorliit aalajangersakkami ilaanersut aamma sapaatip akunneri sisamat qaangiutsinnagit oqaloqatiginninnissamut saneqqunneqarsinnaasut.

#### *Pisoqalisoorneq pillugu aalajangersakkat*

**§ 8.** § 5 naapertorlugu naammagittaalliut, pisimasup maalaarutiginiakkap ilisimalerneraniit imaluunniit ilisimalersimasariaqarfianniit ukiut marluk qaangiutsinnagit Nunatsinni Nakorsaaneqarfimmut tunniunneqassaaq.

*Imm. 2.* Taamaakkaluartoq § 5 naapertorlugu naammagittaalliut, pissutsit naammagittaalliuutigineqartut ulluata kingorna ukiut tallimat qaangiutsinnagit tunniunneqassaaq.

*Imm. 3.* Naammagittaalliornissamut killissarititat imm. 1 aamma 2-mi taaneqartut allanngortinneqarsinnaanngillat.

#### *Pisortat peqqinnissaqarfiutaannisuliarinninnivik pillugu naammagittaalliut (sullinneqarnermut naammagittaalliut)*

**§ 9.** Sullissineq pillugu naammagittaalliutit Nunatsinni Nakorsaaneqarfimmut tunniunneqassapput.

*Imm. 2.* Nunatsinni Nakorsaaneqarfiup peqqinnissaqarfimmi qullersatut aqutsisunut naammagittaalliummik suliarinnittussanut naammagittaalliut ingerlateqqissavaa.

*Imm. 3.* Sullissineq pillugu allakkatigut naammagittaalliutit naammagittaalliortumit katsorsaavimmuut imaluunniit peqqinnissaqarfimmi qullersanut toqqaannartumik nassiunneqarpata sullissineq pillugu naammagittaalliut taanna Nunatsinni Nakorsaaneqarfimmuut ingerlateqqinneqassaaq.

*Imm. 4.* Naammagittaalliup tigungeraniit qaammatit pingasut iluanni suliarineqassaaq, tak. imm. 2.

### **Kapital 3**

#### *Napparsimasut taarsiiffigineqarnissaannik suliat*

#### *Napparsimasut ajoqusernerinut taarsineq*

**§ 10.** Kapitalimi uani malittarisassat malillugit napparsimasunut imaluunniit napparsimasunut qimagaasunut Kalaallit Nunaanni misissortinnernut, suliaritinnermut assigisaannilluunniit peqqinnissaqarfimmi sulisumit imaluunniit peqqinnissaqarfimmi sulisunit allanit, pisortat oqartussaaffiini allanit imaluunniit namminersortunit suliarineqartunut atatillugu ajoqusernernerut taarsiissuteqartoqarsinnaavoq.

*Imm. 2.* Napparsimasunut sanilliunneqarput napparsimasup nappaataata suussusersineranut imaluunniit katsorsarneqarneranut atasumik ilaanngitsuni peqqinnissakkut ilisimatusarnermi misileraanermi peqataasut. Tamanna aamma timip ipiusartaasaanik allatigulluunniit timip ilaanit tigusiffiusunut timip pisataanut tunniussisunut atuuppoq..

*Imm. 3.* Kapitali manna aamma napparsimasunut Kalaallit Nunaata avataani napparsimavinni, klinikini il.il. akeqanngitsumik katsorsarneqartunut imaluunniit katsorsartinnermut tapiiffigineqartunut, katsorsaaviusumi inatsisit malillugit taarsiisoqarnissaanut periarfissaqanngitsunut atuuppoq.

*Imm. 4.* Suliassaqarfiit sorliit aalajangersakkami ilaanerat pillugit malittarisassanik erseqqinnerusunik Naalakkersuisut aalajangersaasinnaapput.

#### *Ajoqusernerit taarsiivigineqarsinnaasut*

**§ 11.** Taarsiisoqassaaq uku arlaannit ajoqusertoqarsimanera ilimanavippat imatullu pisimappat:

- 1) Suliassaqarfimmi pineqartumi immikkut ilisimasalik misilittagaqartoq Kalaallit Nunaanni allatigut pissutsini atugaasuni misissuineri, katsorsaanerme assigisaaniluunniit allatut iliuuseqarsimasinnaagaluartoq naatsorsuutigineqarsinnaappat, taamaalilluni ajoquserneq pinngitsoortinneqarsinnaasimagaluarpat,
- 2) ajoquserneq misissuinerme, katsorsaanerme assigisaaniluunniit taakkunungaluunniit atatillugu atorineqartuni teknikkikkut atortuni, sakkuni atortuniluunniit allani kukkunermik imaluunniit ajutoornermik pissuteqarpat,
- 3) kingornatigut naliliineq aallaavigalugu ajoquserneq nakorsaanikkut isiginninneq aallaavigalugu napparsimasup nappaataanik katsorsaanissamut taamaaqataanik

sunniuteqarsinnaasoq katsorsaannermi teknikkut imaluunniit katsorsaariaatsit pigineqartut iluaqutigalugit pinngitsoortinneqarsinnaasimagaluarpat, imaluunniit

4) misissuinerup malitsigisaanik, tassunga ilanngullugu nappaammik suussusiiniarluni pilattaaneq, imaluunniit katsorsaannermi napparsimasup naammaginartumik naammagiinnarsinnaasaanit annertunerusumik aseruuttoornikkut allatigulluunniit nappaatip nassataatigut ajoquserneqarsimappat, Tassani ilaatigut ajoqusernerup ilungersunartuunera, ilaatigut napparsimasup nappaataa allatigullu peqqinnikkut qanoq ittuunera kiisalu ajoqusernerup qaqutigooortuunera taassumalu ajoqusiisinnaaneranut periarfissat eqqarsaatigineqassapput.

**§ 12.** Napparsimasup nappaataata eqqortumik suussuserneqannginnerata malitsigisaanik ajoqusernermi § 11, nr. 1 aamma 2-mi pisut taaneqartut taamaallaat taarsiiviginninnissamut tunngaviusinnaapput.

*Imm. 2.* Ajutoornermi, § 11 nr. 2-mut ilaanngitsuni taamaallaat taarsiisoqassaaq ajoqusertoq katsorsaavimmi katsorsarneqarpat il.il. ajutoornerlu taassuma iluani pisimappat pisuni taamaattuni katsorsaavik nalinginnaasumik taarsiinissamut inatsisini malittarisassat malillugit tamatumunnga taarsiisussatut isigineqartariaqarluni.

**§ 13.** § 10, imm. 2-mi ilaasunut inunnut misileraaffigineqartunut timillu pisataanik tunisisunut misileraaneq imaluunniit timip ipiutaasartaanik il.il. tigusineq pissutigalugu ajoqusernertut sunulluunniit taarsiisoqassaaq, ajoqusernerup allamik peqquteqarnera ilimanavinnigippat imaluunniit ajoquserneq annikitsuinnaappat.

**§ 14.** Peqqinnissakkut sulisutut akuerisaq kinaluunniit sulinermini kapitali manna malillugu taarsiiffigitinneqarsinnaasutut naatsorsuutigisariaqartunik ajoqusernertut ilisimasaqalersoq tamanna pillugu ajoquserneqartumut ilisimatitsisussaataavoq kiisalu pisariaqartitsineq malillugu Nunatsinni Nakorsaaneqarfimmut nalunaarutiginninnissamik ikiuuttussaataalluni.

*Imm. 2.* Paasissutissiinissamut pisussaaffik pillugu malittarisassanik erseqqinnerusunik Naalakkersuisut aalajangersaasinnaapput.

*Taarsiinissamik annertussusiliineq il.il.*

**§ 15.** Taarsiinerit ajunngitsorsiassallu taarsiinissamut akisussaaneq pillugu inatsimmi malittarisassat malillugit aalajangersarneqassapput, taamaattorli tak. imm. 2-7 aamma §§ 16-18.

*Imm. 2.* Imm. 1 malillugu taarsiineq aammalu ajunngitsorsiassat taarsiinermiit imaluunniit ajunngitsorsiassaniit nammineq akiliutit ilanngaatigineqareerpata tunniunneqassapput, tak. imm. 7.

*Imm. 3.* Imm. 2 naapertorlugu nammineq akiliutit pillugit malittarisassat aalajangersarneqartut § 10, imm. 2-mi ajoqusernertut ilaasunut atuutsinneqassanngillat.

*Imm. 4.* Alla sinnerlugu akilersimasanut piunnaasaqatit matussutissaannut taarsiisoqassanngilaq.

*Imm. 5.* Taarsigassarsiaq imaluunniit ajunngitsorsiassaq imm. 2 malillugu nammineq akiliummiit ilanngaatigineqarpat Napparsimasunut Taarsiissuteqartarfiup § 25, imm. 4 malillugu aalajangiineranut piffissami atuuttoq aningaasanik iluarsiissutaasartoq atorpeqassaaq.

*Imm. 6.* Ajoquserneq sulisinnaajunnaarnermik nappaammilluunniit piffissaq aalajangersimasoq sinnerlugu sivisunerpaamik qaammatinik pingasunik sivisussuseqarsinnaasumik sivisuneruppat, sulinermi akissarsianik annaasaqarnernut matussutissat aamma anniarnermut ajunngitsorsiassat aatsaat tunniunneqarsinnaaneri pillugu malittarisassanik Naalackersuisut aalajangersaasinnaapput.

*Imm. 7.* Nammineq akiliummut tunngasunik malittarisassanik erseqqinnerusunik Naalackersuisut aalajangersaassapput.

**§ 16.** Inatsisartut inatsisaanni kapitali 3-mut ilaasumik ajoqusernerup malitsigisaanik suli 18-inik ukioqalernani toqusumut meeqqamut angajoqqaatut oqartussaasoq imaluunniit oqartussaasut ajunngitsorsiassanik pisinnaatitaaffeqarput, nal. Imm.4.

*Imm. 2.* Meeqqami imm. 1-imi ilaasumi paasineqassaaq meeraq inuulluni erniusoq, kiisalu naartuneq sivikinnerpaamik sapaatit akunneri 22-t tamackersimallugit meeraq toqungalluni erniusoq.

*Imm. 3.* Imm. 1 malillugu ajunngitsorsiassat ataasiaannarlugit tunniunneqarsinnaapput. Angajoqqaatut oqartussaaffik ataatsimoorunneqarluni angajoqqaatut oqartussaaffiuppat tamarmik immikkut ajunngitsorsiassat affaanik imm. 1 malillugu pissarsissapput.

*Imm. 4.* Naalackersuisut imm.1-imi ajunngitsorsiassat eqqaaneqartut pillugit maleruagassiussapput, tassunga ajunngitsorsiassap annertussaa ilaassaaq.

**§ 17.** Taarsiinissamut akisussaaneq pillugu inatsimmi § 3, § 4, imm. 1, § 6, imm. 2, § 8, § 13, imm. 1, oqaaseqatigiit aappaat aamma § 14 a malillugu taarsiinermi ajunngitsorsiassanilu aningaasat, kapitali 3-mi malittarisassat malillugit tunniunneqartut taarsiinermi akisussaaffik pillugu inatsimmi § 15, imm. 1-mi malittarisassat malillugit iluarsineqassapput aamma piffissami aalajangiiffiusumi aningaasat iluarsiissutaasut atuuttut tunngavigalugit aalajangersarneqarlutik.

*Imm. 2.* Taarsiinissamut akisussaaneq pillugu inatsimmi § 7 malillugu ukiumut akissarsiat aamma kapitali 3-mi malittarisassat malillugit tunniunneqartussat, piffissami ajoqusernerup pinerata piffissallu aalajangiiffiusup akornanni taarsiinissamut akisussaaneq pillugu inatsimmi § 14 malillugu taarsiinissamut akisussaaneq pillugu inatsimmi § 15, imm. 1-imi malittarisassat malillugit iluarsineqassapput.

*Imm. 3.* Taarsiinissamut akisussaaneq pillugu inatsimmi §§ 1, 2 aamma 12 malillugu aningaasat taarsiissutaasut ajunngitsorsiassallu, kapitali 3-mi malittarisassat malillugit tunniunneqartussat taarsiinermi akisussaaffik pillugu inatsimmi § 15, imm. 1, oqaaseqatigiit siullerni malittarisassat iluarsineqassapput aamma piffissami aalajangiiffiusumi aningaasat iluarsiissutaasut atuuttut tunngavigalugit aalajangersarneqarlutik. Aningaasat iluarsineqartut

koruunit aningaasartaanut 5-imik agguarneqarsinnaasumut qaninnerpaamik akunnaallisinneqassapput.

*Imm. 4.* § 16 malillugu ajunngitsorsiassat piffissami naatsorsuiffiusumi atuuttut § 16, imm. 4 malillugu aningaasat tunuliaqutaralugit aalajangersarneqassapput.

**§ 18.** Taarsiineq ajunngitsorsiassallu taarsiinissaq ajunngitsorsiassanillu tunniussinissaq pillugu aalajangiinermi piffissap kingorna sapaatit akunnerinit tallimanit kingusinnerusumut akilerneqarpat piffissami aalajangiinermiit akiliinissap tungaanut kingusinaartumik il.il. akiliinermi erniat pillugit inatsit pillugu Kalaallit Nunaannut nalunaarut naapertorlugu ernianut naapertuuttumik ukiumut ernialiisoqassaaq.

**§ 19.** Napparsimasoq piaaraluni imaluunniit mianersuaalliungaatsiarnikkut ajoqusernermut peqataasimappat, napparsimasumut taassumaluunniit qimataanut taarsiinissaq appartinneqassaaq.

**§ 20.** Kapitalimi matumani malittarisassat naapertorlugit napparsimasoq taassumaluunniit qimataa taarsiivigineqarsimappat imaluunniit taarsiivigineqarnissamik piumasaqarsimappat ajoqusernermut taarsiinissamut akisussaasinnaasumut taarsiinissamut piumasaqaateqarsinnaanngilaq.

**§ 21.** Kinaluunniit, nalinginnaasumik taarsinissamut piumasaqaatit malillugit § 10-mut ilaasumut napparsimasumut taassumaluunniit qimataanut taarsiinissamut akisussaalersimappat, piaaraluni ajoquserneq pisimappat, § 15-16 naapertorlugu taarsiinerit alla sinnerlugu akilersimasanut piumasaqaatinut taamaallaat tunngaviusinnaapput, tak. taamaattoq § 22.

**§ 22.** Tunisassianut akisussaaneq pillugu malittarisassat malillugit taarsiinissamut akisussaaneq pineqarsimatillugu §§ 20-imi 21-milu malittarisassat atuutissanngillat.

*Taarsiiviginninnissamut sillimmasersimanissamullu pisussaaffiit*

**§ 23.** Kapitali manna naapertorlugu tullinguuttut taarsiinissamut pisussaaffeqarput:

- 1) Pisortani peqqinnissaqarfiup iluani katsorsaanerup kingorna ajoqusernernut Naalackersuisut, tassunga ilanngullugit napparsimaviit, peqqissaaviit, peqqissaasoqarfiit, nunaqarfinni nakorsiartarfiit il.il. aamma namminersorlutik oqartussani allani katsorsaanerup kingorna ajoqusernernut
- 2) Kommunini pisortat sullissiviini katsorsaanerup kingorna ajoqusernernut napparsimasunut kommunimi najugaqartunut.
- 3) Pisortani peqqinnissaqarfiup avataani katsorsaanerup kingorna ajoqusernernut katsorsaaviit namminersortut.



§ 24. Kapitali manna malillugu taarsiinissaq pillugu piumasaqaat sillimmasiisarfimmi sillimmasiinermit matussusersimanissaa pillugu piumasaqaat pillugu malittarisassanik Naalakkersuisut aalajangersaasinnaapput.

*Taarsiinissamut suliat suliarineqarnerat*

§ 25. Taarsiinissamut suliat tamarmik kapitali manna naapertorlugu Nunatsinni Nakorsaaneqarfimmut tunniunneqartassapput.

*Imm. 2.* Nunatsinni Nakorsaaneqarfik misissoriikkanik allattuiffimmi atortunik katsorsaavimmit oqaaseqaammik pissarsiniassaaq, aamma taarsiinissaq pillugu suliap aalajangersimasup naliliiffigineranut pingaaruteqartutut isigineqarsinnaasut Kalaallit Nunaanni pissutsinik atukkanillu allaaserinnittumik suliamik saqqummiussinissamut suliarinnissaaq. Suliamik saqqummiussineq atugassallu Napparsimasunut Taarsiissuteqartarfimmut Danmark-imut nassiunneqassapput taarsiinissamullu suliap suliarineqarneranut tunngavissatut ilaatinneqassallutik.

*Imm. 3.* Nunatsinni Nakorsaaneqarfik suliap piareersarneranut atatillugu pisoqalisoornera pillugu aamma naammagittaalliuutip Inatsisartut inatsisaata atuuffiata iluaniinnersoq pillugu aalajangiisinnaavoq. Aalajangiineq taanna aalajangiinerup naammagittaalliuuteqartumit tigungeraniit sapaatit akunneri sisamat iluanni naammagittaalliuutigineqarsinnaavoq. Nunatsinni Nakorsaaneqarfiup aalajangiinera naammagittaalliuutigineqarpat suliarineqarnissaa siunertaralugu Napparsimasunut Taarsiissuteqartarfimmut suliaq nassiunneqassaaq.

*Imm. 4.* Inatsisartut inatsisaat manna malillugu taarsiinissaq pillugu suliat Danmarkimi Napparsimasunut Taarsiisasuteqartarfimmit aalajangiiffigineqassapput. Aalajangiineq Napparsimasunut Taarsiissuteqartarfimmit Nunatsinni Nakorsaaneqarfimmut nassiunneqassaaq tassanilu nutserneqareerpat suliassami illuatungiliuttunut nassiunneqassalluni. *Imm. 6*-imit takusinnaasoq naammagittaalliuuteqarnissamut piffissaliussap naanerata kingorna taarsiinissamut ajunngitsorsiassallu aningaasartaanik aalajangersarneqartunik taarsiinissamut pisussaaffeqartut oqartussat akiliissapput.

*Imm. 5.* Aalajangiinerit, tak. *imm. 4*, suliassami illuatungiliuttunit Napparsimasunut Taarsiissuteqartarfimmut Suliareqqitassanngortitanik Aalajangiisartut suliassanngortinneqarsinnaapput, taanna inaarutaasumik allaffissornikkut aalajangiisalluni. Napparsimasunut Taarsiissuteqartarfimmut Suliareqqitassanngortitanik Aalajangiisarfiup matuma kingorna aalajangiineq atuuttussanngortissinnaavaa, atorunnaarsillugu imaluunniit allanngortillugu.

*Imm. 6.* Napparsimasunut Taarsiissuteqartarfimmut Suliareqqitassanngortitanik Aalajangiisararfimmut naammagittaalliuut Nunatsinni Nakorsaaneqarfimmut tunniunneqassapput, aalajangiineq pillugu nalunaarummik naammagittaalliuuteqartup tigusineraniit qaammat ataaseq qaangiutsinnagu. Naammagittaalliorneq kinguartitsinermik kinguneqartarpoq.

*Imm. 7.* Tamatumunnga immikkut pissutissaqartillugu naammagittaalliuuteqarnissamut piffissaliussap, tak. imm. 6, qaangerneqarnera Nunatsinni Nakorsaaneqarfiup pingaartissanngilaa.

**§ 26.** Napparsimasunut Taarsiissuteqartarfimmut Suliareqqitassanngortitanik Aalajangiisarfiup

aalajangiineri eqqartuussivimmut suliassanngortinneqarsinnaapput, tassani aalajangiineq aalajangersarneqarsinnaalluni, atorunnaarsinneqarluni imaluunniit allanngortinneqarluni.

*Imm. 2.* Aalajangiinerup nalunaarutigineqarnerata kingorna qaammatit arfinillit qaangiutinnginnerini aalajangiineq eqqartuussivimmut suliassanngortinneqarsinnaavoq.

**§ 27.** Taarsiineq ajunngitsorsiassallu § 25, imm. 4 malillugu akilerneqartut taarsiinissamut ajunngitsorsiassanulluunnit piumasagaatini allani utertillugit akileqquneqarsinnaanngillat imaluunniit ilanngaatigineqarsinnaanngillat, tak. taamaattoq imm. 2.

*Imm. 2.* Napparsimasoq imaluunniit napparsimasumit qimataasut nalunngikkaluarlugu paasissutissanik tunniussisimangippata imaluunniit paasissutissanik eqqunngitsunik tunniussisimappata, aamma paasissutissat pigineqarlutik Napparsimasunut Taarsiissuteqartarfiup imaluunniit Napparsimasunut Taarsiissuteqartarfimmut Suliareqqitassanngortitanik Aalajangiisartut aalajangiineranit allaanerusumik paasissutissat amigaataasut imaluunniit kukkusut allamik aalajangiinermik kinguneqarsimappata taava Napparsimasunut Taarsiissuteqartarfik imaluunniit Napparsimasunut Taarsiissuteqartarfimmut Suliareqqitassanngortitanik Aalajangiisartut nutaamik aalajangiissapput.

*Imm. 3.* Taarsiinissamut pisussaaffeqartup, tak. imm. 2, Napparsimasunut Taarsiissuteqartarfimmiit imaluunniit Napparsimasunut Taarsiissuteqartarfimmut Suliareqqitassanngortitanik Aalajangiisartuniit nutaamik aalajangiisoqarnera tunuliaqutaralugu § 25, imm. 4 malillugu tunniunneqarsimasut taarsigassarsiat aamma ajunngitsorsiassat utertinneqarnissaat piumasarisinnaavai. Utertillugit akilerneqarnissaannik piumasagaat taamaallaat atuutissaaq aalajangiinernut paasissutissat pineqartut aalajangiinerup inerneranut pingaaruteqarsimappata.

*Inuk pillugu paasissutissanut periarfissaqarneq suliarinninnerlu*

**§ 28.** Nunatsinni Nakorsaaneqarfik peqqinnissaqarfimmit, katsorsaavinnit namminersortutut ingerlanneqartunit, peqqinnissaqarfimmi sulisunit, pisortani oqartussanit, pisortat sullissiviinit il.il. allaniillu attuumassuteqartunit kiisalu ajoqusersimasumit paasissutissanik sunilluunniit nalunaaruteqaqqullugu akeqanngitsumik nalunaaruteqaqquneqarsinnaavoq, tassunga ilanngullugit napparsimmavimmiit allattuiffiit, napparsimasoq pillugu nalunaarsuiffiit, politiit nalunaarutaat, toqungasumik pilattaalluni misissuinermiit nalunaarusiat, sillimmasiisarfinniit soraarnerussutisianillu ingerlatseqatigiiffinniit paasissutissat il.il., kapitali manna malillugu suliap suliarineranut pingaaruteqartutut Nunatsinni Nakorsaaneqarfimmiit missiliorneqartut.

*Imm. 2.* Paasissutissat tak. imm. 1 noqqaassutip tигuneraniit ullut qulit qaangiutinnagit Nunatsinni Nakorsaaneqarfimmut nassiunneqassapput. Piffissaliussaq eqqortinneqarsinnaanngippat piffissaliussap naannginnerani piffissaliussap qaangerneqarnissaanut tunngavilersuut aamma noqqaassutip qaqugu naammassillugu suliarineqarsinnaanera pillugu Nunatsinni Nakorsaaneqarfik nalunaarfigineqassaaq. Paasissutissat elektroniskit iluseqartillugit aaneqarsinnaapput.

*Imm. 3.* Suliareqqitassanngortitanik aalajangiisarfiup suliamik suliarinninnerani paasissutissanik pisariaqartunik Nunatsinni Nakorsaaneqarfik Napparsimasunut Taarsiissuteqarfimmut kiisalu Napparsimasunut Taarsiissuteqartarfimmut Suliareqqitassanngortitanik Aalajangiisarfimmut nassiussissaaq, § 25, imm. 4 aamma 5 takukkit.

*Pisoqalisoorneq pillugu aalajangersakkat*

**§ 29.** Kapitali manna naapertorlugu taarsiinissaq pillugu piumasaqaat, taarsiivigineqarsinnaatitaasup ilisimasaanit imaluunniit ilisimasariaqagaanit kingusinnerpaamik ukiut pingasut qaangiutsinnagit Nunatsinni Nakorsaaneqarfimmut nalunaarutigineqarsimassaaq, taamaattorli imm. 2 takuuk.

*Imm. 2.* Taarsiinissamulli piumasaqaat ullup ajoqusernermut pissutaasumiit kingusinnerpaamik ukiut qulit qaangiunneranni pisoqalisoorsinnaavoq.

*Imm. 3.* Imm. 1 aamma 2-mi eqqaaneqartut piffissaliussaniit immikkut akuersissuteqartoqarsinnaanngilaq.

*Pineqaatissiissutit pillugit aalajangersakkat*

**§ 30.** Peqqussummik naammassinninnginneq, tak. § 28, Kalaallit Nunaanni pinerluttulerinermi Inatsimmi malittarisassat naapertorlugit pineqaatissiinermik akiliisitsinikkut kinguneqartinneqarsinnaavoq.

*Imm. 2.* Akiliisitsissutit imm. 1 malillugit pineqaatissiissutigineqartut Nunatta Karsianut pisassanngortinneqassapput.

**§ 31.** Inatsisartut inatsisaat naapertorlugu najoqqutassanut atuutsinneqartunut Kalaallit Nunaanni Pinerluttulerinermut Inatsimmi malittarisassiat malillugit akileeqqusissutitut ittumik pineqaatissiissutinik aalajangersaasoqarsinnaavoq.

*Imm. 2.* Inatsisartut inatsisaat imaluunniit Inatsisartut inatsisaat naapertorlugu najoqqutassat atuutilersinneqartut akiliisitsissummik aalajangersaanissamut tunngavissiisimappata akiliisitsissut pinerluttulerinermi inatsimmi malittarisassat naapertorlugit inatsisitigut pisinnaatitaasumut pisussaatitaasumullu akileqquneqarsinnaavoq.

*Imm. 3.* Imm. 1-2 malillugit suliak Kalaallit Nunaanni Eqqartuussivimmut suliaqartussat siullertut suliakkiutigineqassapput.

*Imm. 4.* Akiliisitsissutit imm. 1-2 malillugit pineqaatissiissutigineqartut Nunatta Karsianut pisassanngortinneqassapput.

## **Kapitali 4**

*Atuutilernissaanut aalajangersakkat, atorunnaarsitsinermut aalajangersakkat aamma  
Inatsisartut inatsisaat allat kingunerisaannik allannguinerit*

**§ 32.** Inatsisartut inatsisaat nalunaarutigineqarneratigut atuutilissaaq.

*Imm. 2.* Peqqinnissakkut ilinniarsimasutut sulisut pillugit naammagittaalliutit pillugit Inatsisartut inatsisaanni kapitali 2 inatsisartut inatsisaata atuutilernerata kingorna suliarineqartunut katsorsaanernut atuuppoq.

*Imm. 3.* Napparsimasut ajoqusernerinut taarsiinissaq pillugu Inatsisartut inatsisaanni kapitali 3 inatsisartut inatsisaata atuutilernerata kingorna pisunut ajoqusernertut atuuppoq.

**§ 33.** Inatsisartut inatsisaata matuma atulernerata peqatigisaanik:

1) Peqqinnissaqarfimmi aqutsineq, aqqissugaaneq kiisalu peqqinnissakkut ilinniarsimasut sulisut aamma tarnip pissusaanik ilisimasallit pillugit Inatsisartut inatsisaanni imatut allannguisoqarpoq:

a) § 9, imm. 4, § 10, imm. 2, § 11 a aamma § 11 b atorunnaarput.

b) § 10, imm. 3 tamatuma kingorna § 10, imm. 2-nngorpoq.

c) § 12, imm. 1-3-mi "§§ 3, 4 aamma 11 a" imatut allanngortinneqassaaq: "§§ 3 aamma 4":

2) Napparsimasut inatsisitigut inissisimanerat pillugu Inatsisartut peqqussutaat:

a) § 33 atorunnaarpoq

*Imm. 2.* Napparsimasut Maalaarutaannik Aalajangiisartunut maalaaruteqartarnek pillugu Namminersorlutik Oqartussat nalunaarutaat nr. 14, 24. september 2012-imeersoq atorunnaarpoq.

*Imm. 3.* Nunatsinni Nakorsaaneqarfiup sulinera pillugu Namminersorlutik Oqartussat nalunaarutaat nr. 7, 15. juni 2017-imeersoq Inatsisartut inatsisaat manna naapertorlugu najoqqutassianik atorunnaarsitsinissaq imaluunniit taarsiinissaq tikillugu atuutiinnassaaq.

*Namminersorlutik Oqartussat, ulloq xx. xxx 2024*

## **Naalakkersuisut Siulittaasuat**